

Malaysia di landasan tepat menjadi ekonomi digital sepenuhnya
Astro Awani
3 November 2018

KUALA LUMPUR: Malaysia terus berada di landasan yang tepat untuk muncul sebagai ekonomi digital sepenuhnya susulan komitmen mengupayakan Industri 4.0 (IR4.0) seperti diumumkan semasa pembentangan Belanjawan 2019.

Naib Presiden Gartner Research, Tervinderjit Singh berkata kerajaan pimpinan Pakatan Harapan telah mencatatkan kemajuan yang baik dalam menyediakan negara, yang akan menyumbang kepada penerimgunaan teknologi secara lebih luas seperti Objek Rangkaian Internet (IoT), pendigitalan dan automasi.

Beliau berkata, peruntukan RM210 juta untuk membantu peralihan perniagaan kepada IR4.0 menerusi Program Penilaian Kesediaan mengukuhkan komitmen kerajaan untuk mempembagakan kemahiran tenaga kerja.

"Berdasarkan Agenda Ketua Pegawai Maklumat (CIO) 2018 Gartner, para CIO menyenaraikan kekurangan bakat dan kemahiran sebagai antara kekangan utama ke arah transformasi digital dalam organisasi. Kami yakin usaha ini adalah langkah tepat untuk menangani masalah itu," katanya dalam kenyataan.

Tervinderjit juga berkata bantuan kewangan sebanyak RM2 bilion untuk menggalakkan perusahaan kecil dan sederhana (PKS) akhirnya akan membuka pasaran baharu bagi industri itu.

"Ini akan terus disokong oleh keputusan kerajaan untuk melabur RM3 bilion dalam Dana Transformasi Pendigitalan Industri bagi memacu pelaksanaan teknologi pintar termasuk automasi dan kecerdasan buatan," katanya.

Sementara itu, Pengurus Negara NetApp bagi Malaysia dan Brunei, Azrin Abd Shukor yakin tumpuan kerajaan kepada pengukuhan infrastruktur melalui Pelan Gentian Optik dan Kesalinghubungan Negara serta pengagihan spektrum jalur lebar yang lebih berkesan akan memastikan setiap perniagaan, organisasi kerajaan dan paling penting rakyat, boleh memanfaatkan nilai sebenar data mereka secara pantas, berkesan dan selamat.

"Kami mengalu-alukan usaha kerajaan memperkenalkan Industry4WRD. Peralihan Malaysia ke arah IR4.0 tidak akan berjaya jika hanya melibatkan NetApp, peserta utama teknologi atau kerajaan semata-mata.

"Justeru itu, kami memuji usaha kerajaan memperkasa PKS untuk menerima revolusi digital melalui peluang pembiayaan bagi mereka melabur dalam automasi dan teknologi baharu," katanya.

2018Astro Awani Network Sdn. Bhd.

(535275-D) All Rights Reserved.

Source: <http://www.astroawani.com/berita-malaysia/malaysia-di-landasan-tepat-menjadi-ekonomi-digital-sepenuhnya-190098>